



對琴以詩名東南與予譚藝有水乳之合乃出  
其餘技以為詞而詞之工復如其詩予嘗屈指  
海內詞家如秋潭蘭泉漁川賓谷杉亭樸樸暹暹暹暹  
落落不數人而以對琴置其間分鑣接軫殊不  
相下此外能望見其腳板者蓋亦甚矣詞忌肥  
濃尚清真惡麤獷貴精雅雕鏤入細造于圓脫  
殊大難事予畏其耗心血費日力故輟不為對  
琴確守詞律力洗滑調冰鏡雪鏤苦心自運後  
乃進于自然一氣環注無復筆痕墨迹者存于

此事可云得其三昧詎彼率爾操觚叫呶塗抹  
者所敢望哉噫嘻人之才各有所限蘇黃詩擅  
天下詞實門外漢至周密張炎又不長于詩對  
琴詩天分人工兩臻其勝氣體高妙奄有衆  
長而詞之精詣又如此兼能並美所得不已奢  
乎世乃動稱古今人不相及何也猶憶京邸合  
昏花下分題角韻對琴獨出慢詞一闕蕭淡欲  
絕衆皆咨嘆謂詞中之有對琴猶詩中之有左  
司今觀全稿舊遊宛在目前而良晤不常何日

度江從酒邊花外聽對琴按四聲二十八調令  
予心開耶辛卯初春同學弟王鳴盛題于西莊  
抱蜀齋



今之爲長短句者率矜尙南宋顧得神解者卒鮮不  
領其音節頓挫之妙與天然之姿致一起一結若爲  
所縛此明嘉隆後之仿盛唐詩也汪君對琴詞不襲  
浙派獨擅吳音每有拈弄如入武夷啖荔枝鮮美獨  
絕又如饌設江瑤柱與羣殽錯迥別使白石老仙及  
夢窓玉田諸君見之定當把臂入林已唐堂老人黃  
之雋

陸士衡言詩緣情而綺靡大雅譏之謂其昧於言志  
之義或以斯語論詩誠非移以論詞則甚得予謂緣

春華閣詩  
情以爲詞信矣而一之於綺靡亦非善之善者也故  
談藝家每艷稱紅牙拍板用十七八歲女郎唱曉風  
殘月若詞家本色無易此種者予不謂然然欲擺脫  
綺麗而誤入辛劉一派尤爲魔劣然此可爲知者道  
耳吾友汪子對琴績文種學其詩超然天得拔戟自  
成一隊旣已橫厲騷壇矣復以餘事爲長短句清音  
亮節具體樂笑翁而生峭之致與折之趣別自煎洗  
於夢窓白石譬之於樂大者爲宮細者爲徵不窅不  
擲分判合度此則廬山真面目也對琴倡乎吾老矣

猶勉爲君倚聲而賡之同學弟陳撰

汪君對琴余老友南軒先生之哲嗣也向工詩兼工  
詞余最敬憚之而相別已久自癸酉迄午未間往來  
燕薊者十餘年樽前花底每一倚聲益歎其咀宮舍  
徵直造古人之奧室嘗謂余曰詞之一道清超者不  
可到渾成者尤不可到少曾就此幸得玉田夢窓者  
十之五六得白石者十之二三得清真者十之一二  
其餘梅谿竹屋諸家皆各有所取而小令則並摘南  
唐北宋之尤雅者集益多師要皆領其神而不欲襲

其貌而竊愧不能名一家者亦卽在此余曰不然山谷云隨人作計終後人自成一家始逼真雲門禪師曰汝等不記已語反記吾語異日裨販我耶學者融會貫通乃變現一重境地子之得力已深合而出之固自成對琴之詞矣同學世弟符曾

風騷而下詩盛於唐詞盛於宋同源異流同工異曲譬之鷓鳴春蛩吟秋氣使然也或謂詞爲詩之餘要非通論東都多逞雄辭南渡一歸雅調白石玉田其詞家之正宗乎吾友對琴汪子眷戀三餘沉酣六籍

懷才未遇淡如也於是四方文人學士靡不景慕其人而對琴亦以此自嬉故南州之榻北海之尊殆無虛日每於酒邊燈下間作倚聲積久遂多已刊成春華閣詞二卷謬以予爲同調屬爲跋語予愛而讀之如聞空山琴語松下幽泉使人不復作塵想真詞中射鵬手也况能溯流尋源出風入雅似可與姜張爭席矣卷中忝附蕪詞未免續貂滋愧清河張四科謹跋

白樂天詩雞林賈人求市之李杜無是也有井水處

能歌柳永詞姜堯章張叔夏無是也折楊皇荊之嗑然何關風雅顧詩家之宗李杜自昌黎以來無異辭而白石玉田之樂府汨蝕勝國至朱竹垞檢討始表章而提唱之然後倚聲者知正音草堂陋習無復有過而問焉者矣然自白石玉田以前若李太白溫飛卿李後主周美成諸人之作其妙處已爲南宋開先而其同時之史梅溪高竹屋吳夢窓王碧山周草窓俱能特立清新之意刪削靡蔓之詞故必兼取諸家之長而後能自成一家若守專家而剽擬之其去俚

詞唯之與阿耳對琴與余論詞大略如此今觀其所刻春華閣詞猶信夫別裁僞體而多師以爲師少陵詩法也對琴乃以爲詞宜其令詞慢詞無不工哉然對琴之詩幽遠閑澹躡王韋之庭而入其室其聲名流於人人而其意思邈然不以祈一時之知也則夫對琴之所以爲詞者寧有異於其所以爲詩者耶豈乾隆庚寅秋九月愚弟凌應曾拜跋

詞果爲詩之餘乎粗豪佻達輩倚酒捉筆自命辛蘇或矜康柳覲然謂可以風雲月露之末緒角勝於聲

音均拍重輕清濁之間此其人匪唯不知詞抑其於  
詩槩可觀也詞之長短句源於三百篇由漢迄唐之  
樂府皆其濫觴極盛於宋南渡以後而入微詣極尤  
推白石老仙蓋白石詩本大家今試讀之淨洗鉛華  
極蕭散自得之趣與其詞之清空騷雅將毋同當時  
名卿鉅儒或愛其人或愛其詩或愛其文與字良繇  
品格綦高蘊蓄亦富心精所至貫綜靡遺非獨規規  
搯譜尋聲已也他如清真以後草窗玉田諸詞家故  
籍散軼其詩或不傳而豈專以詞名哉對琴汪君子

髫年交夙以詩擅場予自甲戌作吏湘楚不共筆研  
者幾廿載庚寅歸自都門對琴出其春華閣詞二卷  
中多附載倡和諸作以無拙製屬綴數語披讀一過  
緣情體物紆徐邃密與其平日所爲詩畧無異致迺  
歎其學之無所不賅而由是以徵其人品翰墨殆猶  
白石有不可以一端盡者行將待詔金馬知必有所  
撰述若大樂議諸篇獻之於朝而名卿鉅儒且爲之  
擊節稱賞也予於詩旣無所窺詞尤知其難而不敢  
臆騁曩從家兄松泉與泝江太史及飲谷樊榭授衣



諸君花亭酒觴分題按拍率以詩律行之曾無足錄  
近且僕僕風塵心荒手重咀宮嚼商固無暇及卽五  
七字韻語亦復頽廢不振對此冰雪能無慨然書此  
以識吾媿同學愚弟江恂拜題

題辭

青娥侑酒紅豆填詞由來換徵移宮兩宋三唐誰似  
白石清空孤飛野雲逸響一聲聲寫上秋桐後繼起  
有西秦遺譜樂笑閒翁 越國王孫好古續湖山類  
稿重喚冬冬 汪水雲湖山類稿  
中有贈許冬冬詩 鎮日花前一笑筆弄  
春風江南唱傳已遍感知音不待歌終纔小令又長  
謠都在卷中 調聲聲慢雲間沈大成

汪倫詩格潭水桃花千幾尺餘技兼工促拍偷聲減  
字中 春華小閣占取綠楊城半角竹屋蕢洲不數

尊前第一流 調減字木蘭花練祁錢大昕

共四十五調

附刻三十調

卷一

共五十七調

附刻二十一調

卷二

共四十五調

附刻三十調

春華閣詞 目錄

卷一

共五十七調

附刻二十一調

卷二

共四十五調

附刻三十調

春華閣詞

春華閣詞卷一

揚州汪棣對琴

踏莎行

眉影當牕啼痕印枕曉樓獨自無端緒鄰家呼與上  
鞦韆柳陰愁聽流鶯語曲寫烏絲心銜紅豆依稀  
往事憑誰訴門前莫摘小桃花蕭郎須識來時路

國香臥牛首山閣

礪道喬松散兩行蕤影同被苔封幽龕不聞經唄犬  
訝人登百尺凌空古塔陟窮巖迴盼高重雲房入窈

窈壁峭無塵欲養心慵 山風涼夜靜獨搯牀相伴  
閣外金容拓南牕出眉際却轟靈峰側裏茫茫銀海  
迴平疇月彩彌濃披衣向天闕何堪遽去下界聞鐘  
解珮令  
酸風漫起葉喧窗砌盼燈明寒生鴛被倦態顰容勝  
一樹前邨穠麗莫相疑綠陰青子 悶愁如織柔腸  
似剪怕黃昏玉簫聲底遠遠征鴻料同宿蘆花叢裏  
更誰憐錦箋難寄

風入松

彈指閣待月次蘭浦韻

霞天林外爛方收暝色滿高樓不知一綫清光出匝  
花陰裊裊烟浮隔苑鶴聲入夢盈階蛩語吟秋 塵  
襟聊爾被閑愁茗椀對緇流干霄梧竹環簷立歇鐘  
魚涼宇俱幽無事常懷阮裕寡聞恐類孫休

同作

宜興

史承謙

蘭浦

城邊暝色夕陽收有客共登樓風簷吹落纖纖月  
照旃檀一片香浮曲徑自生虛籟疎林已作新秋  
凭闌凝望可消愁耿耿素暉流笙歌羅綺喧闐  
處總輸他法界清幽把臂何煩阮籍吟詩須結湯

休

芭蕉雨 題金山圖

一片飛來洞壑下重檐不見風濤作塔影具含圓覺  
看煞檻外雲橫天邊日落 纜舟沙嶼引酌前事尚  
如昨思砥柱却從中流躍轉令我眼迷離渾似遠挂  
晴帆斜吹冷角

釣船笛

送蘭浦歸陽羨並賀却扇之喜

悵別已年年一棹歸程偏速涼月清霜夜永却料量  
漁屋 曉牕風韻有雙鬟應遣明璫簇罨畫溪邊春

水看鴛鴦同浴

洞仙歌

思量不起只合慵騰去隊隊飛來燕鶯侶向花前指  
點暗裏流光一時把萬斛愁腸付與 闌珊春事盡  
紫筍紅櫻寂寞無人共樽俎且聽畫闌西翠幄初濃  
隔小苑歌聲一縷更遣我深宵夢魂孤還獨臥池塘  
棟風梅雨

水龍吟

閱蘭浦秋琴集感贈

闌珊春事匆匆簾前早見楊花落腰因人瘦鬢隨年

改久成寂寞一室高歌百年孤興茫茫奚托看嬌鶯  
乳燕蹁躑自得笑何事空塵縛 大雅誰云不作怕  
良夜風懷總惡玉斲銷愁金徽理怨無言翻覺羈客  
閒階謾製荷衣已拋紅藥想他時招我罨畫溪邊釣  
輪同泊

念奴嬌 登康山

睡餘蝶夢下涼階悵眺烟光又暮十尺臺高容膝久  
却轟黃花深處佛塔凌雲賈帆如薺都入登臨賦踏  
枝倦鵲不知月白梳羽 徒感跡已成灰人猶未遠

殘醕澆塵土舊日琵琶傳鐵撥難寫平生心緒冷落  
前庭風吹敗葉腰鼓猶存否牆陰蛩遍剪燈欲共閑  
語

同作 小重山

歙縣 汪棟 春橋

黃葉飄飄映晚霞闌干層疊處月痕斜扶筇提榼  
踏平沙臺邊坐閒說舊宮花 勝會百年誇荒邱  
留不住舊繁華傷心怕見樹棲鴉還應喚紅袖撥

琵琶

金縷曲

閣影清池底日厭厭更無人處睡魂斜倚榆莢楊花  
都惹恨一任風光如駛那不見漫天委地賸粉零香  
還憶昔問人生何福能消此癡與黯究誰是 聯牀  
有客中宵起歎牕下螢乾蠹老詎堪長爾濁酒不辭  
歌一曲爭笑敝廬孤士唾壺碎干卿何事聊自破啼  
爲笑去聽鶯聲縷縷層陰裏檐外映暮山紫

虞美人

樓前滾滾颺輕絮兩槳橫塘去迴風偏覺聽聲遙翻  
惹蠶媒蝶使各相嘲 他時重過應能記門外縈嵐

翠蘭情水盼却逢卿忍令一朝相見不知名

一剪梅

支枕簾垂到夜分風鐸無聲雨漏無聲思量往事夢  
難成淺笑分明低語分明 檀几焚香睡鴨清閑庭  
溼露細草流螢更闌獨自下階行月影亭亭人影亭  
亭

驀山溪

初夏同蘭浦春橋過彈指閣

林光如纈逕入禪房曲鈴犬隔花迎叩重扉茶烟初  
熟樓前更倚虬幹直參天冪歷下葉層層繞牆陰濃

綠空簷碎影三兩青禽蹴回首坐蒲團樂閑境吟  
魂盥沐珠裝螺髻祇變滅塵容却毋煩藝名香龕底  
深盟祝

南樓令

孤負早涼天幽痾乍可捐怪方書藥裏纏綿坐待客  
來還自戀斜枕畔薄衾邊暄影度如年颼颼聽不  
眠攪秋風院竹蕭然側裏凌霄花數朶却掩映八牕  
偏

高陽臺

雨洗梧階蛩吟莎徑一庭涼露蕭蕭倦意孤懷裊雲  
沉水無聊枕函空作雙鴛夢縱牽情容易相拋醒猶  
憐舊日經行柳外紅橋祇拚杯底消愁緒却愁多  
對酒半晌難消閑度征鴻紛紛木葉齊飄打鐘掃地  
平生願念疎狂勝侶誰招莫推窗冷月關情又挂林  
梢

南浦

迴憶金陵寓樓並寄姚宋邨吳恆齋史蘭  
浦凌裕圃吳竹嶼王琴德嚴水西兄春橋

孤月最關情記秦淮曾共圓輝如絢疎樹晚棲鴉重  
簷下風榭半開人倦歌成引酌白頭青鬢絲絲見只



少琵琶紅袖撥不似小庭春院 今宵薄袂寒侵忽  
 迢迢感舊懷人難遣何減對嬋娟雕闌外簫鼓畫船  
 聽遍夜潮纔濺斷橋幾曲縈秋怨除了垂楊飄渡口  
 殘壘冷烟誰念

疎影

奉賢劉茗柯明府長沙人相遇于吳恆齋  
 之得樹軒卽以寓廣陵所填畫屏秋色一  
 闕相示因贈

萍逢乍洽看閒搜舊蹟囂闌時踏水調添愁堪笑樊  
 川春風偏縱情狎參軍一賦繪蕪城又勝彼烟花蕭  
 颯料三湘夙積吟編嶽麓鄉園環匝 曾聽繭絲保

障仿前賢宰邑婁水聲合博辨深杯故友歡邀好寄  
 秋宵涼榻洞庭木落蕭蕭下莫回首雲山重沓並爲  
 留牕戶翛然隔樹晚霞俱納

步蟾宮

元旦試筆

凍雲壓檻蕊燈結歲時改重簾方揭迴思昨夜不成  
 眠鬢絲裏年光迅絕 山梅一放鶯調舌早又是踏  
 青時節從今畫閣數花風總莫遣瑤樽暫缺

八聲甘州

幼讀韋左司詩對琴無一事新興復  
 何如二語心最賞之囑友爲圖并綴

此曲

念浮生難拂是愁襟誰與繪空林更巖几香清石牀  
甌冷閑喚秋禽幽意忽成雅曲箏笛遜鳴琴獨立凝  
眸處薄靄輕陰 往事垂虹詩老有小紅簫底掩袖  
微吟却聲希韻淡別趣冷遙岑歎年年燕昏鶯曉惹  
愁腸那似砌蛩深還須仗冰絃玉柱一奏清音

同作

醉桃源

錢唐陳撰玉几

絲聲立志免絃安烟籠松石間誰思重晏戴公山  
翻嫌五弄繁 焦尾烈響泉寒摩娑性自閒清談  
馬稍亦非歡願同長嘯還

又 廣寒秋

臨潼張世進嘯齋

空山人靜閒牀花落焦尾雖陳不御想君得趣在  
無絃倩林下松風代鼓 知音原寡同聲斯應流  
水高山漫撫於今且暫輟宮商定有個鍾期待汝

又 風入松

祁門馬日璐半查

衆山響後寂無喧白石拂牀寬空林日送飛鴻去  
移人意海上成連坐處復因長嘯匣開似可忘言  
橫來何必具徽絃趣在有無間左司句好時吟  
玩署頭銜自詡蕭閒漫說堪圖臥枕最輸靜畔幽

蘭

又齊天樂

江都閔 華 玉井

翛然林水深幽境伊人與誰為侶焦尾材良斷紋  
製美常共閒中朝暮長安幾度曾欲碎還留重攜  
歸路將覓知音天涯迢遞渺何許 舊絃時復自  
理摘左司句好別字因署影散鴻飛聲希鳳杳那  
必一彈再鼓樂床漫撫看點點金徽含愁無數不  
分秋風雲程猶滯汝

又水龍吟

震澤 張 棟 看雲

廣陵調古誰彈拂牀焦尾無人御空庭月落瑣牕  
人靜悄然無語目送飛鴻響隨流水淨蠲塵慮望  
玉僊攜手松風颺颺便心會天然處 休說成連  
音妙衆山中科頭箕踞神融意徹左司新興不由  
人助詎似泉明絃徽希設襟懷騫翥却無心感歎  
當前景物落花飛絮

又臺城路

錢唐 陳 臯 對鷗

幽巖岑寂無人到清琴自攜為伍玉軫離離金徽  
粲粲鎮日橫牀閑撫調高不鼓想世少知音子期

難遇抱向空山夕陽林下自來去  
長安歸又幾  
載歎曾將碎首肯汚塵土澗水追涼松風覺夢依  
舊前時情緒得能玩趣歎何必弦聲方稱解悟好  
畔烟霞是中尋太古

又鵲橋仙

儀徵江昱松泉

松風夢裏雲山弦外三尺靜橫寥宇空山惟有石  
嶢嶢却可惜無人聽處  
秋清於水人間似鶴一  
種希微誰語烟泉落葉冷琮琤也當得水雲新譜

又金風玉露相逢曲

臨潼張四科漁川

疎林籟息寥天月上何事橫琴不理雖云調古聽  
人稀况屏絕箏琶俗耳  
嵇生嬾性韋郎高致但  
愛平分烏几高山流水本心生原不在松風繞指

又霜天曉角

上海凌應曾裕圃

松風吹去秋滿瀟湘雨試聽無聲絃指誰領得此  
中趣  
遙夜淡香縷月明垂葉露彷彿刺船東海

又目送早鴻度

又如此江山

桐鄉朱方靄春橋

竹西歌吹繁華地斯人却耽岑寂澗底鳴泉松梢

春華閣詩  
卷一  
灑雨絕勝紛紛箏笛石牀三尺只焦尾枯桐更無  
他物風度疎林琴邊時見墮殘葉無事幾番靜  
對便手揮目送神伎休說古調聲希元音趣淡解  
聽問誰能得蒼茫獨立但袖手何妨不須彈徹倘  
遇鍾期冰絃方自拭

又菩薩蠻

歙縣

程晉芳

葢園

緗梅多處安琴薦玉爐裊碧烟如綫流響兩三聲  
山空秋月清閑中編小史次第傳官徵微諦少  
人知契禪兼說詩

又摸魚子

金山趙文哲  
璞函

向西牕剪燈清話閒居新興何似吹簫詩老風情  
減只有爨桐知己無个事看古木涼雲一片蕭疎  
意閒心靜對恍獨立空山孤吟日暮雨雪小門閉  
還凝想多少南鄰北里嘈嘈絲竹盈耳箇中誰  
解無聲趣可許抱琴人至攜塵尾便著我松間踞  
轉彈流水披圖徙倚但幾陣飛鴻數聲殘葉寂寞

下寒翠

掃花游

酬琴德

關河素侶共幾度高歌驀然重見綠牕未遍正冷閉  
青瑣地幽塵遠細數心期屢仗空江孤鴈入經苑羨  
研討典章閑意傾款 揄袂寒亦淺想百丈堯峰凍  
容初展松鱗逕蘚問遊情可入翫春吟卷却異停車  
坐愛霜紅遠岸何當伴向山程暮聽離管

原作

青浦王昶 琴德

性耽紅葉記蜀紙新詩那時曾見燈窗咏遍正落  
月相思故人天遠袖裏音書目斷蘆花冷鴈在吳  
苑喜一笑乍逢同話情款 江南春尚淺望雨後

山梅粉痕輕展蹋殘碧蘚想瓢裏定有暗香詞卷  
回首蕪城也擬扁舟水岸約吟伴聽珠簾夜深歌  
管

丁香結

秋日過禪智寺

霜色侵衣曉牕初覺竚立小庭無賴謾笑香城隘迤  
邐去一抹林縈烟態賦情人已遠簌簌下檻曲應改  
寒泉閒汲睠此茗椀清遊欲再 興慨算水調喧闐  
約略斜陽逕外往事鶯花前塵水月總消金界還惜  
碑齧凹壁勁畫幾殘壞聽風傳遠籟數點江峰凝黛

菩薩蠻

西窗一枕聽秋雨蕭蕭梧葉愁千縷莫問可憐宵憑  
誰慰寂寥年時簾底過綺語叮嚀和白了鬢邊絲  
相思到幾時

更漏子

和江蔗畦

燕釵低羅袖薄記得當時簾箔庭露下井梧飛腰肢  
瘦幾圍瑣牕閒深戶鍵悵望星河未遠情脈脈夜  
迢迢夢長魂暗銷

臺城路

一庭涼雨蕭蕭過池塘乍消殘暑湘簟紋清冰絃韻  
遠欹枕祇堪獨語雙星一度怪清淺銀河也成羈阻  
渺渺余懷倩誰遙訴洛媛浦而今猶說鏡約歡情  
重屈指鬢絲非故畫扇初拋輕衫漸薄空憶舊銷魂  
處休歌白紵且盼得他時再歌金縷昨夜秋聲暗牕  
聽正苦

長亭怨

席上有能爲吳江歌者愴成一闋

記前度鴨頭波輒淒斷深宵艣聲初遠術自誰工坐  
中偏似意難遣夢纏低轉猶彷彿吟魂返牕檻閃寒

星孤枕上柔腸如剪  
輕婉想風流白傅此際與懷  
非淺瀟瀟暮雨更惹起吳孃清怨綺筵上翦燭傳神  
聽扇底聲回重變况僕本愁人曾見雙蛾難展

清平樂

銀蟾當戶暗把更籌數今夕留歡須小住待看牽牛  
花吐從教清怨成塵事如春夢無痕寄語莫拋團  
扇歌時曾障朱脣

買陂塘

滬城別趙璞函

向西風問伊何事吹殘江滸黃葉羈懷獨倚銷魂甚

况復翠尊難別歌乍咽歎握手無多又鼓吳孃檝階  
蛩響切便剪燭筠牕聯牀不寐相對也愁絕  
絲絲柳最是津亭上下無情翻被攀折琴歌酒頌渾閒事  
那更子規啼血涼露裛記白下分箋逸興猶能說兩  
心如結縱蓴菜鱸魚一番拋去千里共圓月

後作

一萼紅

趙文哲

暮雲停正瑟居人獨對酒憶良朋白下題詩青溪  
問渡幾番潭水深情恨醉裏匆匆分手放扁舟腸  
斷踏歌聲秋雨秋風江南江北無限長亭  
惟有



相思依舊趁迢迢芳草綠到蕪城走馬吟春吹簫  
弄月風流誰與君爭空想像名園翠竹問何時同  
聽玉瓏玲還怕沈腰潘鬢重見須驚

減字木蘭花

筠榭屬題乞巧圖

銀河一度不爽靈鳥中夜赴何處樓陰默禱遙知各  
有心露涼秋淺佳會年年終不遠玉果青瓜空憶  
鍼期笑語譁

秋蕊香

悄聽風筠晚轉欄角乍生幽怨淺顰忽自入閨院月

漾羅裙半展重來獨惜春階變空曾見碎叢糝地  
白如霰閒語雙飛小燕

霜天曉角

涼颼盈榻一枕蟲吟雜亭外曲池荷影却何待遊茗  
雪牕匝枝半壓簷鈴聲自荅但得歸心較穩又那  
怕湘雲合

祝英臺近

遊慧山懷王梅泝陳竹町張漁川易松滋

水痕圓巖翠斂晴望碧天遠紺宇何年疎磬一林晚  
忽令離緒重重吟魂漠漠了無賴荻花孤岸征鴻

怨獨倚川上浮梁閑放欲歸眼霞映泉清酌罷塵襟  
浣可能埽地焚香相從佞佛更換却吟瓢酒盞

玉樓春

團團一片嬋娟影爭挽輕衫來比並髻鬟狼藉太恩  
息纔出迷藏叢篠徑鄰娃年齒少參差斜插金釵  
紅玉映非關裙帶惹殘花蝴蝶隨風香獨凝

解連環

壬申三月同蘭浦春橋遊攝山次蘭浦韻

澗邊虛榜從齋寮初憩別尋藤杖噪暮雀偏滯遊尋  
看邃壑冷烟隱籠榛莽壁嶂高懸覆深穴蘚侵池上

更山牕月午曲幹虬松夜影千狀空晨滿襟忽恍  
靄林巒萬疊引入孤賞想見冠籜人遙徑路風雲俱  
泯塵瘴靈粟仙禾遍法供都資甘養烏能忍牧樵可  
伍轉拋栗椽

原作

史承謙

乍停吳榜指靈山深處待攜筇杖吹幾陣料峭東  
風喚得得青驢緩過林莽一半斜陽早已掛古藤  
蘿上更松聲竹影引入霞心佳景難狀莫說圖  
經惝恍想當年僧紹始窮幽賞羨煞渺渺禪栖隔

看華閣詩 卷一  
世界由旬盡剗煩瘴慚愧塵容且暫領烟雲供養  
約他年結茅行藥采芝拾橡

綺羅香

碧浪吹衣涼雲映幙猶記那回芳豔水驛羈魂驀地  
輕盈如見伴孤棹冷雨疎烟盼高城嫩鶯雛燕恨雙  
魚尺素無憑小橋偏隔暮潮淺 西泠遊徑未遠襟  
上酒痕依舊年時難辨斷送黃昏甚處玉簫哀怨縱  
謝娘眉嫵重逢早潘令鬢絲難免料昨宵獨倚妝樓  
望窮帆影轉

法曲獻仙音

舟次昆陵寄懷裕圃少華竹嶼璞

野岸鳴榔層城擊柝惹起一天鄉思鴈沒西風帆懸  
殘照吟箋欲疊誰寄笑離別平生慣應無遣愁計  
但牢記看星星酒痕深淺銷凝久曾共短檠紅穗蕭  
颯晚秋天料茂陵人復何似那得并刀剪取急流江  
水共蓼花蘆葉半幅吳綃窗底

西子妝

過深柳堂桐城姚宋邨有詩紀游因賦

水影浮梁人聲古塊凝盼忽增吟興牆陰曲曲掩雙  
扉問何年菊楓三徑凭闌滄茗却閣下鷗眠正穩短

籬遮甚垂楊能繫迷離紅影  
從君聽驀地心清隔  
院泠泠磬冶春都覓玉鉤斜綻官梅踏殘寒嶺誰憐  
一角城南路烟光乍冷更蕭蕭遠浦叢蘆欲暝

霜葉飛

由細林至鳳凰橫雲諸山同裕圃憩涇南張大司寇園

晚蟬高柳聲何急蕭蕭橋外雙槳愛穿林樾倚孤筇  
直到屏顏上俯首處空濛萬狀漁簪斜破蘋花浪甚  
寺響齋鐘亂葉下紆迴入徑木樨初放孤枕偶共  
鷗眠侵晨裊露斷浦重得幽賞參差樓閣蠹晴空嘯  
傲人何往但入耳懸崖樵唱華亭鸞鶴乘雲去看不

盡烟雲滅隔戶蒼髯獨成閒曠

壁上有輪與蒼髯牆外叟梅花看到菊花

天之句即文敏自題

補作 憶舊遊

凌應曾

到宿雲一塢風滿空樓桂發空山試問蒼髯叟恁  
梅殘菊老閱歷年年我亦幾番游款佳處儘盤桓  
看壁上龍蛇依然飛動日落天寒樽前攜仙侶  
按蕢洲漁笛刻燭分箋悵望林泉好把華亭唳鶴  
都付啼鵑十年嬾拈詞筆霜葉喚前烟待寄與汪  
倫涇南重放秋水船

聲聲慢

春橋兄齋中秋葵獨開婷婷可玩並約蘭浦同賦

涼雲乍斂小雨斜飛同驚一度清秋曲徑潛通風叢  
別有枝柔何嫌額黃半露捲鶯簾纔下妝樓還記起  
那玉人前度厭禳裝留倦夜閒愁侵枕聽蛩吟無  
歇窗砌聲幽小豔疎香低徊思賦還休緜裙不逢五  
疊見檀心空自凝眸晚燈上摘芳蕤聊當酒籌

洞仙歌

題采芝圖

依稀漢水見江妃遊處解珮曾逢鄭交甫却蟬紗淡  
碧魚頰深紅行又止肩下傴僂如訴煙鬟那更得

瓊液金盤纖手同攜入雲路仙種自療饑一葉拈來  
愛鼻下清香時遇况又近軒轅古臺邊看低執筠籃  
獨尋鸞侶

渡江雲

瓜洲放舟

孤城吹曉角夜殘海日剛照一帆懸風流傳往事猶  
自山門玉帶說當年雲開浪白又依稀瘞鶴灘邊須  
乞取蒲桃京口吟望好江天愀然南徐重鎮北府  
雄兵甚烽烟銷盡空賸得霜沉法鼓雨滴寒泉隔船  
莫作桓伊弄怕感懷今夜無眠情緒惡淒音絕似啼

鷓鴣

琵琶仙 金閨晚泊

斜日揚舫堞樓下一帶荒涼吳苑珠幌猶蔽何鄉秋  
空片雲卷風漸急橫塘乍渡便穿入虎山西崦野草  
低迷寒鴉下上渾是淒怨 看胥口波面靈旗未輸  
爾鴟夷五湖遠無限亂山銜碧閃烟檣斜展空認取  
麋城鶴市只望中破楚門鍵料得遙夜鐘聲夢回難  
遣

鳳來朝

垂虹橋閑步

臥水搖清影石梁遙洗塵似鏡信東南一葉虹霓橫  
霽氣朗檻邊凭 古塔何年迴迎市寰囂露橋獨淨  
偶與觸松陵詠諒不負小紅靚

鬲溪梅令

登烟雨樓

陌塵不上水中庭細波縈淡淡斜陽移塔影皆迎一  
隅吹市聲 打魚舫子晚昏橫鷺閒停恨不烟霏涼  
雨滿湖清敞開樓下扇

玉梅令

歙鄉獨坐悠然閣眺望○閣即松明山下先世讀書園最勝處也

微陽閣內几印簷陰碎虬枝結百年巖背翫石牀半

蝕仄逕繞杉藤牕正拓盃芬未退  
溪紋晃碧雛鳥  
閒成隊吟還暇課農畎澮想舊時遊釣曲構迴凌空  
斜挽入斷嵐如續

古香慢

同四弟桐峰彙日阻風錢唐江上迨停  
檝而六橋初霽錦浪入林遂不憚乘興  
繞南屏鷺嶺之間

軟溫傍水坦迤無塵褰袂偕往却值嬉春鬢影鈿轅  
幾兩迴訴怒濤飛夢寧到緋桃陌上快天開豔冶妙  
繪似霞一片鋪廣泛藻荇低排蘭槩風送湖心澄  
籟凝響淡遠巒光暗獻翠眉嬌樣短嶼獨夷猶更何

處鐘魚晚放壁千尋面璇刹凜然屏障

瑣窻寒

蘭浦天才淹雅而賈志於歌詩飲酒春  
橋暨余與之同寒燠者二十年真不禁  
人琴之感長源儲君其同鄉石友也偶填一  
解誦則酸鼻爰倚聲和之

淡月閑窻微塵客館舊高吟處低徊欲往忍過桐陰  
疎樹記年時白門弔古幾回夢斷鍾山渡算青蓮逸  
興樊川冶思尚存前古休訴離悰苦更何地荒雞  
夜中起舞襟期相許却全爲鶯花羈悞祇空留陽羨  
淚痕沉淪一壑風煙句怕再逢琴榻茶鐺小庭同嘯  
侶

原作

荆溪 儲國鈞 長源

瘦竹門閒叢蘭砌冷故人何處離情萬縷夢繞漢  
 陽芳樹甚經年信音遼邈鯉魚不溯寒江渡歎文  
 園病久滿襟風月頓成千古 難訴天涯苦剩梁  
 燕空歸鏡鸞羞舞淒涼如許算都被才華輕悞黯  
 蘅臯無限碧雲而今唱杳江南句最可憐淚灑黃  
 蘆醉鄉無伴侶

玉蝴蝶

題關中史渭占取適圖岑嘉州漁父詩  
 云世人那得解深意此翁取適非取魚  
 蓋圖中所託也

物外綸竿閑逸孤情彌奧不欲真漁絹素描摹猶憶  
 讀古人書放烟簪岸垂深柳欹雨笠門對殘蒲又誰  
 憐鬢惹隻影拋却蝸廬 堪娛人生行樂偶攜笻簪  
 便入蓬壺水闊天遙更於何地侶鷗鳧醉時歌樵奚  
 妨問高處立鳥亦相呼笑空江權寒簑重山雪方鋪

水龍吟

癸酉初夏重晤符葑林農部于京邸焚  
 香一室散帙滿牀舊時風格畢露往往  
 出新吟一二相證並攷四聲二十八調與勃  
 勃不可遏屬和渡河一闋風塵躑躅之况余  
 亦微露斯篇

滔滔誰似洪河水天外一時排倒下通淮泗旁連渭



洛中原環遶獨立長隄鴈聲滅沒霞天不了甚一葦  
纔渡驚沙遍野已全獻關山道 一綫黃流如帶却  
何年直趨瀾渺回頭東望輝映雙眉綴雲風爪墟肇  
崑崙燉煌復郡恍同林表想靈源那計區區偃鼠肯  
盤渦小

原作

錢唐

符

曾

葯林

劈翻濁浪排空起連著星河傾倒羊腸九曲龍門  
千里黃河直遶西出潼關東臨淮海驚波未了歎  
泛槎人去尋源路遠當時事何從道 我欲乘風

歸渡望家山水雲飄渺且須小住壺中境印雪泥  
鴻爪扇大河流一帆飛過致身霞表回看鵬背上  
青天只作笠圓低小

木蘭花慢

大雪獨坐陶然亭塔然無侶向夕乃歸因訪謝編修東墅吳舍人杉亭

小庭延過客正牕外雪方濃看樹蔽低垣雲凝古塊  
一片寒空烟霞尚嫌入骨復探幽短壑被塵容吟眺  
誰知臘盡醉眠但卜年豐 迷濛欲去何從思嘯侶  
徑應通任噪晚饑鴉狺寒瘦犬笑我孤蹤深巷幾人  
肩戶甚勞勞風帽不能逢翻悔樓高極目未看雲樹

江東

壺中天

夜牕無語對盪瑣燈下蕊叢如豆書卷閒緡空弔古  
不禁風生兩袖客詡鳶肩余慙馬齒相顧都非舊牖  
懸明鏡鬢毛從此添驟 早是躑躅輪蹄燕南問道  
幾度郵亭埃憑几清宵還自起翻惜難勝樽酒樵叟  
非倫釣徒莫結偏被吟牋瘦寒烟隴樹下階輝映疑  
晝

一萼紅

王西莊光祿招集合歡花下

敞幽齋正璣玞兩樹凝盼愜高懷塵淨開樽客喧索  
句蟲魚都入談諧却堪羨中仙閑逸任朝昏舒卷百  
端皆斜日猶遮殘茸忽墮別助詩才 匹馬紆遲自  
笑看朋儔徒倚儂始能來慨慷燕歌婀娜吳語遊蹤  
歸計偏乖且從觀絲繁葉密生涼蔭歡暢聚天街遽  
問檐牙已暝路析聞纔

玉京秋

宿善果寺酬錢擇石太史

聽梵罷涼颺散階城剪燈深話壁溼烟雲帙盈雅頌  
愁銷杯學孤枕依然淡寂賦閒情塵坌寧惹沿籬罅

幾叢秋卉向人低亞  
每愧萍蹤相迂閱年頻風懷  
盡寫寺瘞鐘脣巖藏龍子偕尋清暇響柝天街總不  
記南國垂綸庭榭一枝借圓月方騰靜夜  
昨會同遊覺生寺秘  
魔崖諸舊蹟

小重山

題松陰夢覺圖

謾謾風平一枕停枝垂濃自映兩眉青懸巖猿鳥野  
花馨閑相喚石上偶然醒  
幽夢幾回經千尋虬幹  
曲布荒坳寒濤高臥不曾聽胸懷適奚埃閣牕瞑

賀新涼

潞河旅次用拙園韻

水泛城陰綠掉輕舟野鳧欲避驟開晴縠風颺絲楊  
垂欹岸心遠荒烟幾曲更何地猶留喧俗日午融融  
波光暖羨文鱗盡效沂川浴漁父把綸竿竹  
橋通池館莓苔徧悄無人石壓玲瓏冷雲環屋跂足移時  
誰爲侶闌外依依麕犢却空惹蝶蠶成簇一片孤懷  
銷不盡趁閑花好向溪邊宿千尺塔隔窗轟

同作

江都

唐司衡

拙園

垂柳悒悒綠試喚取輕舸野泛波紋似縠山抹微  
雲天貼水彷彿鑑湖之曲羨此際襟懷不俗蘆葉

參差抽浦漉趁平沙暖處鳧翁浴算只少風敲竹  
中流頓豁烟塵目見了些遠村蕭寺酒帘茅屋  
岸上牽船多別趣稚子驅來黃犢更搖漾野花幾  
簇塔影憑虛當檻落記春明游歷剛三宿又蚤傍  
帆檣矗

尉遲杯

潭柘寺歸途作是日裕圃同宿戒壇

平巒複又暗送屐齒雲嵐麓迴看密樹參差中有鸞  
音西竺珠幢寶網都不似恆沙影金粟閣凌虛一晌  
裴徊浩然烟海迷目沉潭舊迹安存空巖上杈枒

獨見磽秃殿外猙獰雙龍子聞梵偈依稀意屬何靈  
蠢誰如濤雨惠常遍邨農百畝沃返籃輦別院鐘魚  
燭昏猶夢淵谷

眉峰碧

題雲門吼瀑圖

巖破溜寒光瀕洞如奔駛仰面紛紛雨雹濺引入襟  
懷止琴觴何定谿淥射雲門寺獨上春風子敬亭  
愜賞茲遊始

梁州令

題秋林坐月圖

暝色籠高樹暗下庭階涼露臨風獨坐迴無譁溪邊

春華閣詞  
卷一  
一片幽輝吐  
修翎孤鶴當  
牕舞閃入蒼烟去  
空山自屏浮慮瓊  
簫響散楸桐路

春華閣詞卷二

春華閣詞卷二

揚州汪棣對琴

謁金門

香階溼不捲雨簾終日一院楊花吹不起春恨翻消  
釋 鍼綫頻拈無力獨守煙姿月格骰子玲瓏紅豆  
入牕前閒自擲

拜星月慢

歷下亭有懷

水漾侵階霞明入樹賸有空亭野態眼底迷濛聽當  
歌難再羨華讌那更琴樽海右重起四映雲山光彩

春華閣詩 卷二  
修竹交流尚依稀闌外 溯遺徽未斷澄明界層樓  
上點點飛紅改雨觸不種芭蕉歛亦西園廢縱浮雲  
莫認從何鬢魂銷甚苦覺鄉心在徒付與鷺浴鷗眠  
共閑蹤遠瀨 自聞秋雨聲不種芭蕉樹邊華泉句也  
浮雲從何來焉知非故鄉李滄溟句也  
而辛稼軒詞又有怕上層樓十日九風雨斷腸點點  
飛紅之語三公皆歷城人少陵詩濟南名士多後世  
猶能不愧

探春慢

遊玉符山靈巖寺

巖旭初騰澗烟尚罩盤紆幽逕鞭馬殿闕金容牕圍  
貝塔齋鉢翛然樸野杉檜層巒上却斜隔雲軒風榭

數聲驚叩山僧別峰豺虎相逐 無垢衣傳萬古看  
勁鐵影磨堅性聞寡水側齋清腹旁光耀想見真如  
非假還似巢巖鶴聽卓錫泉淙飛下那得離塵披襟  
深岫禪舍

宴清都

望岱頂迴憶上十八盤

霧曉峰全變車驅過百重明滅猶眩蟠松遠澗垂猿  
斷嶺舊時留戀征衫又惹風塵料隱隱山靈識面歎  
甚日洞口誅茆飈簾長對寒片 關河躑躅頻年孤  
懷不樂憑覽先倦陰崖篆古幽叢日淡興隨時遣還

思怪石欹登迴無際滄波一綫那更惜衝冒烟雲握  
衣瑤殿

遶佛閣

松影

陟岡百尺風日正午松蓋斜隔篩影坡隙却如倒引  
喬柯寫深碧短釵可摘璀璨錯鬣五還上簾額樓閣迴  
出離奇誰似虬龍踞磐石障子孰遺地直幹蕤鬚  
生畫格林密更宜銀蟾穿皓色記獨夜空山巢蔽修  
翮隱巖留迹較飲水天台俱耐高寂漏疎陰儘堪閑  
奕

琵琶仙

竹影

欄曲紅牆看斜吹露下蒼筠搖漾狐鼯秋夜爲羣清  
陰踏叢響堪諷嘯絲菸亦賴漏明月更恣幽賞匝徑  
玲瓏臨風旖旎深避休往舊曾聽樓觀千間遍璇  
刹檀欒濩墀廣何限翠竿新粉與添描屏幃還灑埽  
蘭陵協律却愛將勁節相餉不掩低亞牕扉暗移書  
幌

減字木蘭花

緋桃如面悔與鞦韆牆角見月上苔階獨坐閒搔碧

看華閣詩 卷二  
玉釵 江鄉偏迴空盼歸鴻雲外影心料難忘曾共  
深盟一炷香

淡黃柳

夏初偶吟兼寄吳退齋家荔亭索賦

吹雲似幕纔放池邊閣翠逕彌鮮抽嫩籜不共樽前  
引酌空捲香簾數階藥 綺衣薄同心坐猶昨燕羣  
出眼前掠况朝來枕上聲非惡鬢朶玫瑰小筐爭喚  
衢巷驚人夢覺

瑞鶴仙影

漁菴以舊咏蘆花相示因次其韻

水叢漉漉沙痕白空江一片開鏡浪堆寒色前灘葭

莢舞搖風頃銀蟾夜淨更昏樹迷濛側映聽差差纖  
鱗閒捕歌隱淡烟影 誰共深邨裏館署秋聲偃居  
波冷飄零最易雪盈磯鷺鷗應省盤豆郵亭早愁對  
蕭蕭碧梗那能禁斷浦敗葦獨泛艇

原作

嘉定

曹仁虎

漁菴

荻洲渺渺漁波遠寒花乍點明鏡霜前披拂磯頭  
搖颺雪鋪千頃澄江練淨有多少丹楓掩映最堪  
愁潮平風急不辨鷺鷗影 遙憶天涯路折贈迢  
迢露華淒冷青芽紫筍到如今舊遊誰省舞盡秋



光歎一片飄零斷梗問何人更泛夜月繫釣艇

荔枝香近

次秦西壩韻

水堂虛颺縹緲散簾影鴨浮文藻蟬散喬柯闌干一  
片斜陽半露晚涼空境輕扇閒擲翻嫌晝永漫從  
榻移倦夢深乍醒十幅羅裙烟縷薄瓊姿稱鬢雲重  
理坐看澆花曲墀淨小罌呼婢休猛

關河令

嬌鶯啼處夢已破散滿階瓊朶欲不思量塵凝深院  
鎖雕鏤還記半鞦韆又却向妝樓重過竚想臨流何

時同畫舸

虞美人

題程筠榭樂句圖

深深庭院翻歌譜蝴蝶攢釵股一聲歇拍晚風天除  
是騷人詞客不能憐十年前事真疑夢又惹吟情  
動新教小玉巧妝梳且與曉窗低驗十眉圖

高陽臺

辛巳夏雨中集榮木軒時沃田將歸華亭卽席話別

檻轉殘鶯牕鋪密葉閑開三徑深幽勝引偏疎相攜  
香甕同浮午餘不斷淋浪雨坐檐楹人淡於秋羨多  
情髮白婆娑猶記妝樓琴歌酒賦今都減但談空



徑草初滋檐花易落曉來細雨迷濛寂寞閑坊窈  
然應絕來蹤叩門忽有停車客喜尊前軟語惺忪  
轉愁余纔得相逢却話離悰 最憐官閣棲遲久  
正思鄉念切覓句情慵悵望河橋蕭蕭偏阻歸鴻  
勸君且把深杯覆縱西窗剪燭忽忽怕明宵聽徹  
哀音獨掩孤蓬

臨江仙

題楓南師巖谿歸棹圖寄姪小函

野岸一篙歸計遂聲聲清吹風秋杖藜巖壑好淹留  
閒心觀稻秫老淚灑松楸 片刻林臯爭送別蓼紅

蘋白增愁遠天如沐碧雲流鴈翔烟外渚人上酒家  
樓

玉漏遲

題江雲碛杏花影裏填詞圖

隔檐燈影颺輕紅一樹攪人幽况椀茗爐香斜裏素  
波溶漾偶向闌干擲笛愛新譜吟成清響心獨賞不  
妨閱世風流相抗 小庭露萼烟梢總幾陣東風埽  
空塵袂跂足孤吹怕動黃昏惆悵樓外雨鳴自慣聽  
曲曲明朝深巷歌慨慷胸懷嗒然閒曠

湘月

平山堂探梅同玉井璞函

踏春已近却琴樽勝侶同放烟艇水暝風微欹瘦石  
一樹繁花斜映玉漱人遙雕闌鑰扇不辨檀欒徑鬢  
毛都改艣搖偏動孤興堪笑枯寂禪關高燒樺燭  
寫迷離疎影閣外流雲更吐出圓魄晶瑩如鏡度鶴  
深松敲鐘短壑叉手縈清聽漁簑三兩空明露下歌  
冷

同作

閔 華

早梅放未已安排筆硯料理茶具雪後湖天且喚  
得一葉扁舟容與水暝松寒花明月暗記取佳遊

處誰家玉筵數聲竹外吹去好是渺渺禪棲無  
人靜夜有冷香遙度暗染春衫總莫辨空裏和烟  
和霧苑樹懸燈伶歌送酒却又銀蟾吐不愁花落  
但愁有客行路

趙文哲

街橫九里愛游氛浣盡曉來酥雨喚得吳篷圓似  
笠斜掠小紅橋路瘦竹風疎淺苔冰滑漸到香深  
處尋花不見微吟聊共遲竚那更人影參差一  
丸冷月移過橫枝去酒醒天寒衣袖薄坐看宵參

春華閣詩 卷二  
八  
低樹簾額搖波船脣偎岸靜與沙禽語閒支水枕  
夢涼應落幽渚

前調

同竹嶼虹橋泛月時卽送歸吳門並邀玉井相和

澄輝欲上又平波一葉搖漾雲谷岡下無聲松徑迴  
影亂淪漣深隩脫兔筠廊跳魚沙嶼小步思濠濮闌  
干低拍水光千頃如穀况經朋侶更番遊尋僻野  
不斷梅邊宿酒幔茶檣都易過重憶一庭幽獨風絮  
初吹露桃已落遠信翻棖觸烟汀鷗鷺權歸尚在山  
麓

同作

長洲吳泰來竹嶼

菴波十里愛蘭橈向晚斜泊鷗渚竹外天斜花幾  
樹曾識劉郎前度扇影圍香簾痕醮碧共譜銷魂  
句玉京人遠梅溪綠暗如許只有山月依然窺  
人瓊魄還照松根路散髮吟商清興在贏得滿身  
涼露芳訊難憑歡場易謝杜宇催歸去空江後夜  
一襟離思誰訴

補作

閔華

澄湖綠淨正桃花遍放紅絢林際丹粉瓊瓏樓閣

外幾樹天斜臨水吳苑人留燕京客去蚤已春如  
此相思今夜月明共照千里 遙擬勝日佳遊清  
池曲檻聞隔花謠吹西日手遮憐舊雨繫得滿懷  
離思酒勸分襟愁生餞席又道君歸矣兩番別苦  
阿誰念我顛顛

少年游

吳門沙白岸索題汴州梅姿伎舊影

低釵玉燕輕衫犀蝶無語意常溫獨客初逢軟塵僅  
見爭得不銷魂 匆匆已悵年華晚花落失遙村復  
此寒宵于思空自脈脈罄孤樽

梁州令

題並蒂菊圖

曾記重陽近別圃霜葩齊褪吟邊孤影已婷婷生綃  
復與添風韻 鹿門偕隱無多遜采藥宜簪鬢駐顏  
那得仙侶從今慣向東籬認

如此江山

登尺五樓望江南山色

平巒數點攢天碧同向一樓明滅拂簾低窗邀涼別  
幌靄色嵐光如纈風簾乍揭覺琴語心清嫩芽津舌  
隔竹穿階窈然延眺忽空絕 曾疑松栝漸老障山  
堂一抹峰影都缺閣瞰遙墟鴉歸極浦排闥青來偏

別休忘步履看江雨模糊岫雲歸截後約還防曲闌  
環露葉

更漏子 為沃田輓吳門閨秀弟子徐若冰

噪風鴉歛雪逕門鍵一庭梅冷珠箔下影垂垂春回  
人不知 琴音咽歌聲歇口授東陽痛絕揮老淚訴  
離愁何時復畫樓

瑣牕寒 杭莖浦太史屬題青山送別圖

水咽離聲峰含怨態峭帆初去斜陽黯黯那待塔鈴  
吹雨望空江楓丹蘋白驛樓迴被巒雲護怪閒眠點

點牽情都到晚汀鷗鷺 還覩年華暮却別壑梅藏

平湖月吐夷猶歸櫂不盡西泠幽趣肯回思燭冷樽

空寂寥兩地高陽侶但孱顏一縷孤烟遠繞南徐樹

釵頭鳳 再送莖浦先生兼攜姬人同歸

疎林晚輕鴻遠一樽還得留嵇阮情千縷愁無侶不

辭同載雪兒歌去許許許 眉峰淺生嬌婉似銀鬚

鬢情堪遣沿沙嶼循江滸歸程迢遞共聽柔艣數數

數

水龍吟 癸未長至前五日沃田處士自吳淞來同杉亭春農耦生集草堂杉亭久客薊

門深喜其解鞍適合而翻憶邨居住夏春農  
有不果約之憾也和沃田

疎疎密密無休黃梅雨灑平簷地鬧殘花藥倦尋杯  
學困眠天氣帆送洪河艣辭圓泖朋儕紛至又潛教  
默默幽情重起牕櫺外延晴翠 猶記年時田舍聽  
農歌醪醖閣底晚嘶柳蜚晨啼花鳴都關人意葺熟  
風徐睡餘吟就別含清味悵無聞獨騎相驚剝啄同

郊垌醉

同作

沈大成

巷南別館清幽小簾細雨陰陰地薄綿猶御生衣

未試熟梅天氣近局相招良辰可愛褰裳而至正  
戎葵開盡高梧新竹闌干外堆濃翠 京雒積年  
別矣數前遊心頭眼底風吹疊鼓龍舟鬧轉添吟  
意活草穿莎鮮鱗透網江鄉佳味夜何其莫管嚴  
城柝急為公沉醉

又

全椒 吳 烱 杉亭

絲絲涼雨輕陰小堂不放簾垂地爐香細裊微風  
搖動膽瓶花氣欹枕清談舉帷一笑衝泥客至印  
閒階幾葉羅羅嫩草雜員蘚浮蒼翠 十載京華



春華閣詩 卷二 三  
塵夢甚關情勞勞因底尊前重見依依舊日故人  
心意碧筍烹鱗青梅沁藕別餘風味且銜杯剪炬  
何妨留我作中山醉

又

桐鄉 俞大謨 耦生

熟梅天氣氤氳素心有約逢舊雨深沈院落鎮日  
簾纖烟凝如霧試茗西窗好花低趁暗香微度算  
巴山舊夢幾番萍梗重來此盟鷗鷺 識得箇中  
真意又何論烟霞相誤燈前繾綣酒邊歡笑幽懷  
自異卽事分箋偷閒對奕正抒情愫又新晴月上

二分清影伴儂歸去

揚州慢

題徐墨耕觀海圖予曾觀海於吳淞之東口因追憶之

水磴遙天烟霾絕島突開萬古滄波吐雙丸下上正  
晝夜如梭倚危石迴風瀾紫貝宮銀闕佺羨星羅盪  
心胸高詠聲聲呼起蛟鼉 采華拾月傍長隄舊日  
經過却鷗泛無虞鵬騫不息澄曠秋多驟雨驚雷何  
惜潮初上溼透青簑翫遊情奇絕一泓重瀉金螺

遶佛閣

戲咏階下秋海棠

碎紅匝路勻襯密葉闌檻低撫風掠蛩戶幾回獨院

無聲墜柔縷侍兒覓主銀燭應共三月庭樹灼灼林  
墅縱多小豔寧似沒階處 眼底滿秋思尚悔年時  
疎未補聊遣細細清香迎客屢歎荏苒風塵頻攪離  
緒被誰輕悞置雨浥嬌鬟珠淚空度又牆陰叢鈴時  
暮

綺羅香

題看雲閣七夕小冊

沼躡風荷階跳露蟀靈會重逢今夕仰睇雙星稠疊  
欲侵吟客羨鵲駕不憚檐端驗蛛絲倍思窗隙甚雲  
山獨礙幽歡翠梭停織屢無隔 涼檠孤夜垂雨遙

識仙家好別淚珠偷積再遇佳期翻怨曩時靈鬪水  
盈盈空望鍼樓語覩覩慣懸機石悵未得瓜果重陳  
訴愁天一碧

同作

鵲橋仙

張棟

銀河似昨鵲橋再駕重看靈妃夜渡仙郎別後更  
相逢算此會從來有數 前愁隔歲今欣匝月澹  
月微雲歸路廿年一閏不尋常莫便笑人間朝暮

又

玉漏遲

閔華

一年重會面靈臺注算人天方便今夕風光未比

那時秋淺只恐霞裾露冷還怯  
迢迢銀漢聊借  
問匝月相思幾多離恨  
好是兩度佳期有粉席  
瓜筵宵深庭院兒女心情此際定穿雙綫容易浮  
雲散彩又添了一番悽惋凝望眼鵲駕津梁應倦

又 聲聲慢

江 昱

涼蟬絕響早鴈無踪斜河好會重攜漫說仙家迢  
遞故作佳期良宵百年有幾敢辭勞烏鵲聯飛瓜  
果設笑人間兒女還結蛛絲  
老子情緣如水便  
相逢兩度何預歡悲荷插林間招悵竹醉空遲爲

文擬追乞巧怕再三煩瀆支機聊復爾恣清狂犢  
鼻更晞

又 湘月

張四科

明河絡角問星駟底事今宵重渡試聽畫欄金井  
畔一葉秋聲添取靈鵲初飛微雲未接此際還愁  
誤沉沉碧落孀娥應倍深妒  
料得天上羣仙眉  
間黃色也許仍歸去不似經年離抱闊翻悵匆匆  
前度粉席重鋪鍼樓再啟分付閑兒女難留夜色  
洗車又灑疎雨

又憶舊游

凌應會

乍風飄金井月冷瑤階前度穿鍼遲了中秋信又  
銀河碧落佳約重尋記得那人無寐羅扇撲流螢  
歎錦瑟華年黃楊時運慣看雙星 沉吟是何夕  
便海傾宮漏祇到天明謾說重逢好却添愁添恨  
多此離襟幽詩一回拈出長繫故園心早白露催  
寒聲聲急擣涼夜砧

又疎簾淡月

臨潼張馨荔門

星期過矣尚一綫銀潢簾外清淺偏是今年綺節

果筵重展雲駟已分經春隔甚匆匆又拋金剪畫  
先凝竚吟還想像客愁孤館 依舊是生衣羅扇  
賸豆架瓜畦露涼秋滿世上情多頻上鍼樓游衍  
漸臺度後靈烏禿悵癡牛服箱難轉低徊往迹廿  
年前事玉京人遠

又解連環

朱方靄

夜涼如水算盈虛節候金風纔至此夕又天上佳  
期向露葉庭前再陳瓜李不是今番已漸近中秋  
天氣正月輪將滿木犀乍放飛觴人醉 回思廿

年風景喜重逢乞巧幾多兒女悵孤踪留滯江淮  
把小扇輕羅仰看無寐靈鵲辛勤兩度引雙星迤  
邐應笑人何蹉跎乘槎歸計

又 玉漏遲

歙縣 江 昉 硯農

露涼今夜裏銀河又見鵲填橋起笑語鄰娃猶繫  
蠟嬰浮水試數數佳期恰再問巧歷重逢曾幾梧獨  
倚西風落葉轉添憔悴 回憶綺閣當年定粉席  
還鋪畫屏無睡怨擬黃楊枝上暗凋連理不分雙  
星耿耿料此夕倍常情致愁莫避早是亂蛩喧砌

又 洞仙歌

臨潼 張 坦 蓮勺

秋風漸老露冷梧桐葉重見中筵綺羅節甚鍼樓  
添了一點靈心贏得箇裊裊蛛絲稠疊 銀河成  
兩度不是今年不怨常時太寥闊想一水盈盈碾  
破冰輪仗飛起微雲低接問繡牀還有石支機怕  
客悞乘槎未能贈別

百字令

咏古劔 ○先司馬太函先生與戚南塘  
少保交最篤少保平倭司馬公實備兵

福寧議將議兵議餉並以舊所練義烏良家  
子翊贊之由臬而撫累成偉績裔孫藏有古  
劔一乃司馬公與少保分佩之而誓以徇閩  
者迨少保改鎮東粵過西湖值中秋四方耆

宿畢集先高祖仲淹公從高祖仲嘉公皆與  
焉少保詩有躬分酒陣縱橫甚劍合風期變  
化神之句自注云昔有寶劍余與司馬公各  
分其一歷水火之變今已四合閱世稍遠所  
異於司馬公敘寶劍篇者亦弗獲詳考而此  
劍已一歸余家惇惠堂中乾隆己丑初秋世  
父默人先生創為合劍圖不獨世守之寶並  
以不朽而當日之湖陰引酌月下倚鋒翫之  
亦令人勃勃色動云

匣中寶鏑問何年  
淬厲寒燄如水績  
著風濤尚賸得一  
握鏗然聲起脊  
隱龜鱗銛留鵬  
尾扼敵曾頻試  
流觴重聚斗間  
夜氣常紫依約  
練帶平鋪摩挲  
舊澤信豐城騰  
瑞麗綬接絲已  
繡澀猶說周防  
魑魅皓彩

底  
歡逢豪吟未杳  
庶免青萍棄延  
平津在但愁躍  
入波

洞仙歌 夢中遊廢圃

晝眠初熟見矮  
簷吹下鄰院殘  
英遍如灑記穠  
春砌外萬朶爭  
榮時倏忽翠減  
紅稀堪訝媿此  
園林寡蝶醉蜂  
癡絮幕香簾自  
牽惹弱植那能  
禁雨驟風狂黯  
無色祇餘芳架  
灌畦翁忍道不  
重開片刻總難  
回舊時豔冶

如此江山 秋水次硯農韻

銀塘千頃浮涼影輕颺穀痕微卷沙嘴魚標溪頭蟹  
斷羣訝秋宵潮滿籬遮匹練透屋角斜陽晶瑩一片  
落木蕭蕭帆隨衡面洞庭遠水榭紅衣狼籍竚危  
磯白鷺蓮葉閒展八月濤飛百川河灌最勝斷潢篙  
淺孤舷繫岸記露下蒹葭滿懷離怨不比邨居跳魚  
紫芡暖

原作

江昉

涵空激灩斜陽外蕭蕭洞庭波卷乍沒苔磯初平  
蓼渚幾陣西風吹滿光搖似練望烟際蒼茫澄明

一片驚起眠鷗背人飛去楚天遠週環翠嵐倒  
影和雲痕淨拭匳鏡新展蟬舍侵涼菱舟泛曉轉  
入蘆灣深淺楓凋隔岸帶紅葉流來暗成淒怨尚  
憶春前半江浮鴨暖

浣溪沙

和薛小鳳

敝簾餘香戀碧衣晝長人靜掩雙扉屏風幾曲境偏  
違閣外一林風絮亂流鶯喚却夢魂歸更無情緒  
淚偷揮

雲仙引

蝙蝠

往復深簷踟躕薄暝無端兩翼偏勞嫌蹈陸怕摩霄  
形模不分鳥鼠夜夜徒依堂厦高塵念但除洞中廣  
乳亭外盈蕉 仙蹤雖覺難招却千載如銀貽老饕  
日伏庚申類殊青赤俱守巖巢含齒而飛更無哺穀  
混沌何從寰海逃訓狐休攝看瑤光耀向在中宵

月華清

蟪蛄

釵隙縈絲衫邊沿跂忽動歡顏私卜慣束腰身送喜  
謬爲名獨曉閣上偶趁兒童夕檻倚還拋竿竹迴矚  
却幽詩在戶偏多棖觸 何至憑伊預告但瑣細休

徵旁俱相祝巧乞鍼期覓檢每難偷宿珠零落小雨  
纔過網搖曳輕颺如蹙織躅看庭前灑掃竭來何屬

采桑子

微颺平捲殘紅去淚在幽花欲度誰家烟海茫茫未  
有涯 燕沉鶯悄春心逝疊嶂難遮鬢色初加一瞬  
闌干日已斜

蘭陵王

冬日泛舟

野風緊湖岸陰陰水靜籬穿透鈴響竹叢踏葉猶兒  
吹寒境樓高心自迴相並溪橋欲暝闌干外疎樹冷



烟一棹夷猶發孤詠  
霜沉斷萍梗見波面空明襟  
度澄瑩沈寥荒景紛前迎更鶴  
依偃仰鶯羣游泳斜  
裏巖寺出夜磬驀然暗中省  
閑凭舊情迸記雪灑  
山窗松迷雲嶺有人風帽銀蹄  
騁令遊思都壯凍魂  
獨醒何當重遇檻幾曲酒痕凝

憶舊遊

昌穀先生有譚藝錄吟朋寒夕余固後  
百年而嚶嚶者也舊曾取圖于都門之  
宣南坊乙酉秋謝東墅學士張少華舍人皆  
倚聲歌之余亦復填此解

記天街小別幾人把臂墨瀋吟箋  
眼底流光速但長  
留圖書語語高元幽窗數間常鍵  
花藥驪闌邊歎一

榻常懸客來半是絲髮盈顛  
陶然放高論識無窮  
情蘊還在芸編琴酌偏難久每關  
河隔別心向遙天  
却值星軺少駐池上敞文筵算廿  
載全憑嚶鳴偶破  
枯寂禪

原作

題後談藝圖

嘉興謝埔東墅

憶秋槐古巷兩度吟壇擘盡蠻箋  
忽忽春明路倩  
丹青妙手譜取談元閑情更揮松  
塵風月快無邊  
歎流水韶光紛紛舊侶半已華顛  
翛然素心客  
共盤桓佳日欣賞鴻篇小別三壺  
上復夢中占夢

握手江天剪燭重題前事明發又離筵問藝圃生  
涯何時對面參畫禪

和作

上海 張熙純 少華

向源頭捨筏衣導搜珠證入吟禪幽意何人省愛  
殘雪映地新月娟娟一編浣餘薇雪歎絕廸功篇  
恁香瓣遙分冰銜近似也自投閒 長安住人海  
但賞接朋樽懶趁朝參談藝聞吳語總音超絃指  
味絕酸醎漫擬金門充隱遄返白雲巖笑鴻爪春  
痕詞林更作佳話傳

驀山溪

題吟眺滌塵樓圖

絲楊盈岸水面接藍出斜裏遶簷楹霧方迷凌虛一  
室閑安几榻吞吐積湖嵐胸高逸堪吟述晝永攤紉  
帙 灘頭放鴨舊蹟思當日更上畫眉橋漾風天軟  
波不溢樓陰空闊烟月八牕開鷗羣一還容膝欲與  
傾春秬

滿庭芳

咏爾雅堂同心蘭卽東張荔門給事松  
坪編修

幽溢瑤階碧侵髹几暢懷蘭蕙成行別莖尤異雙蕊  
自潛藏會記同心繫易一言頃其臭堪方誰能及攢

同露瓣並整晚清妝 他鄉逢鴈序槐廳柏寺名早  
流芳愧一時融曉蘭簿無忘今憩秋風里巷室延入  
久詎聞香磁罌滿靈葩分豔偏獲晚中良 客中亦曾  
連歲結鄰  
故以南史張  
陸並宅爲喻

揚州慢

湖上餞送辛楣學士入都同看雲棕亭  
松泉裕圃

晴郭含烟細波環檻却逢片刻傷離正西風薦爽惹  
岸柳飄絲掉船去猶開菡萏水天涼處聊舉螺卮閣  
凌虛同坐深簷江岫參差 舊聞勝賞遍吳山歌誌  
留遺甚寺障青松橋迎紅藥又費吟思握手客皆湖

海秋郊望總覺神怡看斜陽南浦盟情旁有鷗知

同作

嘉定

錢大昕

辛楣

山借南徐井通西蜀天容我輩清狂自紅橋十里  
泛瀲灩波光選幾處竹梧影裏小亭孤榭深院虛  
廊趁秋風徐到吹人心地都涼 故交握手話相  
思數載參商似沙散仍搏萍漂偶聚茲會難忘起  
屬二分明月勾留住一片詩腸記汪倫情重桃花  
潭水俱長

又

張棟

吳地鶯花練川風月別來路尚無多過竹西勝地  
愛幾處笙歌况 車駕南來暫駐涼亭燠館遙帶  
滄波值新秋雨後驚翻一片殘荷 玉堂學士佩  
銀魚重上鑾坡縱振筆蓬山含毫鎖院可憶烟蘿  
且看隔江遠岫千層聳翠色嵯峨把鷺溪輕劈扁  
舟隨意婆娑

又

全椒 金兆燕 棕亭

殘雨迎秋斷虹收暝綠楊一片城西倩湘靈妙詠  
寫遠黛峰齊羨書畫扁舟到處酒人詞客襟袖爭

題奈沙鷗涼夢今宵偏隔前溪 俊遊舊侶憶當  
年樽酒同攜悵盡日重尋紗籠粉堵塵蹟都迷此  
後玉堂清夜應還念茆舍疎籬怎簫聲聽罷停觴  
旋更歌驪

又

江 昱

風蛻辭枝露蓮飄渚碧天冷浸波澄指堂開木杪  
共撫檻雲平漫憑弔歐蘇舊跡斷橋斂樹渾惱吟  
情悵經時風雨涼烟空滿林垞 好春過却乘閒  
來猶及秋晴縱運酒船稀徵歌榭冷偏稱孤清可

惜片帆催發秋衾夢迴憶鷗盟且松岡閑醉留人  
遲月遙汀

又

凌應曾

依淥園亭夾隄樓閣繡成十里揚州悵歐蘇不見  
落我輩扁舟問當日紅橋一曲黑頭仙侶能說前  
游向斜陽如此湖山還倦登樓柳條又折算萍  
逢何似江鷗便十日平原題襟載酒難遣離愁竟  
踏軟紅香土烟波渺留譜蕢洲但三分明月盧溝  
同照邗溝

暗香

憩焦山竹樓下寄白岸松滋徐莪農吳梅查

壑雲不竭罨墜枝半褪靈峰疑齧靜鎖南樓翠色春  
深入窗纈孤徑籬通窈窕支筇去簷簷風愜忍舍却  
樹底幽菴波近阻雙屨巖缺廣洞穴想隱跡必奇  
愈不名滅客帆幾葉天半低臨浪堆雪剛得浮圖對  
峙霞裏現圓明空偈縱汲水佳處獨與彌勒接

念奴嬌

己丑夏日郡中池荷遍為雨傷聞鑾江最勝處亦然不禁惋惜竹樓工繪偶寫

數枝相慰並書憶東城荷花一闕於幘首因次韻奉酬

涼雲弗起乍絺衣浴罷碧天俱洗豔絕雙蕖懸素壁

摘近銀塘蘋芰閣射斜陽欄迎曉露各有嫣然致江  
城如畫舊看千頃浮水 幾處翠蓋亭亭閒欹菡萏  
偏少蘭橈事水珮風裳多旖旎誰寄湘臯吟思月淡  
花低波明香遠惆悵難同此燈昏傾葉尚疑颺影寒  
碎

原作

儀徵

方元鹿

竹樓

商聲初起正惺忪雨過秋光如洗薦爽金風迴枕  
簟驀地關情荷芰翠蓋紅花芳心媚臉多少亭亭  
致蘭橈人遠夢回何處烟水 依約一艇城東邀

涼載酒觸忤今番秋思病眼看花籠香無分不信  
緣如此恰輸鴛侶半奩萍影衝碎

瑞鶴仙

看雲寫雲山雙鶴圖相贈並系以詞卽  
次元韻題畫

寒巖留夕照漏白雲半吐千霄柯老何聲暎清曉出  
修翎皓質肯同凡鳥羊公風渺尚愁貽氈毳訕笑却  
常思海外三山遍覓露漿瓊草 塵少霜階振潔鷄  
網雞羣盡消烟杪仙胎自好無人憾騏驥小繞林端  
復岫迴翔六翮快意寥天雲悄縱他年幻化何須更  
來華表

原作

張棟

山多明遠照正一雙臯鶴頂丹翮老引吭徹清曉  
與同遊彩鳳傳書青鳥翔雲縹緲有仙翁回頭獨  
笑好看他闔苑蓬萊拾取玉砂瑤草多少上清  
宮殿露咽霞餐水邊林杪雲容儘好裴徊處蒼崖  
小喜騰騫非遠罡風浩劫不怕衣裳寒悄挈同儔  
隔絕塵氛朗吟雲表

歸田樂引

荔門給事自關中來以遞游嵩華詩相示戲填奉答

峻壁清眸飽散筇屐烟雲猶繞嶽色應相肖御風聽

講易龍蟄寧掉雪立心傳有同道游情誰獨尠愧  
濟勝偏思巖壑窈願從涼夕覓侶三花隩更攜謝眺  
句隱叩穹表呼吸能通遜知早

解蹀躞

隔窗翠蛾細蹙舊態還拋與柳陰驕馬嘶風認柔縷  
迴憶鏡約多愆繚綾小字緘封幾迴空許檻邊去  
鶯燕年華都共東牆積愁緒轉憐腸斷尊前在重聚  
未忍裁破鴛鴦錦梭曾卜蘭情不應輕誤

南鄉子

涼葉下柯飛聯作雙葩始願違間檢篋香銷已盡風  
微空有離情落敝衣 深夕度幽輝跪捧金鑪祝繡  
幃舌底莫憑心豈據忘歸不記桐花覆舊屏

春華閣詞卷二





